

Inatsisartut Suleriaasianni § 33 naapertorlugu matumuuna Naalakkersuisut aalajangiiffigisassatut siunnersuut tulliuuttoq saqqummiuppaat:

**Aningaasatigut peqquserluutinik malunnarunnaarsaaneq aamma peqqarniisaarniarnermut aningaasalersuineq pitsaaliorniarlugit pineqaatissiissutit pillugit inatsisini (aningaasatigut peqquserluutinik malunnarunnaarsaaneq pillugu inatsit) inatsisit assigiinngitsut aalajangersagaanni, Kalaallit nunaani ataatsimut peqqussummik Kalaallit Nunaanni Namminersorlutik Oqartussat atulersitsinerat pillugu Inatsisartunut aalajangiiffigisassatut siunnersuut**  
(Aningaasaqarnermut Akileraartarnermullu Naalakkersuisoq)

### **Tungavilersuut**

Peqqussummut missingiut una aqputigalugu aningaasatigut peqquserluutinik malunnarunnaarsaaneq pillugu inatsisip, Kunngip Peqqussutaatigut nr. 920, ulloq 26. juni 2023-meersukkut Kalaallit Nunaannut atuutilersinneqartup nutarternissaa siunertaavoq.

Siunnersuutikkut qallunaat inatsisaannik allannguinerit arlallit, aningaasatigut peqquserluutinik malunnarunnaarsaaneq pillugu inatsimmut allannguutinik imaqartut Kalaallit Nunaanni atortussanngortinneqassapput. Kalaallit Nunaanni inatsisit nunatsinni pissutsit aallaavigalugit nunat tamat aalajangersagaannut naapertuuttunngortinnissaasa qularnaarnissaat, aalajangiiffigisassatut siunnersuummi siunertaavoq.

### **Siunnersuutip imarisai pingaarnertit**

Peqqussummi nunanit allanit kortit siumoortumik immeriikkat atorlugit kinaassutsimik takutitsinani akiliutit inerteqqutigineqalerput.

Peqatigisaanik Erhvervsstyrelsen advokatrådillu atuunnerat pisinnaatitaanerallu pillugit aalajangersakkat eqqunneqarput.

Taakku saniatigut qarasaasiami aningaasalianik nioqquteqartut pilersitsisartullu aningaasatigut peqquserluutinik malunnarunnaarsaaneq pillugu inatsimmi peqqussummut ilaalersinneqarput. Aammattaaq aningaasalersuisarnermi sullissisut qarasaasiami aningaasalianik atulersitsinermut attuumassuteqartut aningaasatigut peqquserluutinik malunnarunnaarsaaneq pillugu inatsimmut ilaatinneqalerput, taamaalillutillu sullitanik ilisarissimanninnissamik, misissuisussaataatarnermut, nalunaaruteqartussaataatarnermut il.il. periutsit pillugit malittarisassanut ilanngunneqarlutik.

Aningaasanut tigusassanut inerteqqut 50.000 kr.-nit 15.000 kr.-nut sukaterneqarnera peqqussutsip aamma malitsigissavaa.

Immikkoortortaqaarfiit, nassiussuisartut tuniniaasartullu nunanut allaneersut, Danmarkimi suliffeqarfinnik ingerlatsisut, aningaasatigut peqquserluutinik malunnarunnaarsaaneq pillugu

inatsit malillugu pisussaaffeqartut, aningaasatigut peqquserluutininik malunnarunnaarsaaneq pillugu inatsimmut ilaatinneqalissapput. Tamanna malittarisassanik atuutereersunik erseqqissaanerinnaavoq.

Peqqussutikkut Finanstilsynip, Erhvervsstyrelsen, Advokatrådet eqquiniaanermilu oqartussaasut nakkutilliinermi piginnaasaat annertusineqassapput, tamatumali saniatigut peqqussut oqartussaasut taaneqartut nakkutilliinermik piginnaasaannut atatillugu pisussaaffii allanngortinneqassanngillat, soorluttaaq tamanna suliffeqarfiit inuillu amerlanerisut nakkutilliinermut ilaatinneqalernissaannik malitseqassanngitsoq.

Peqqussutikkuttaaq inuit politikikkut nuimasut nassuiarneqarnerat annertusineqassaaq, taamaalilluni ministerinut immikkut siunnersortit ilaatinneqalissallutik.

Finanstilsyni peqqussummi aningaasatigut peqquserluutininik malunnarunnaarsaaneq pillugu inatsimmi § 48, imm. 2-mik, suliffeqarfiit aningaasalersuinerimi sullissinernik arlalinnik ingerlataqartut Finanstilsynimi nalunaarsorsimanissamut pisussaaffiinik imaqartumi, unioqquitsinermi allaffissornikkut akiliisitsinnaanermut periarfissaqalissapput.

Aningaasatigut peqquserluutininik malunnarunnaarsaaneq pillugu inatsimmi allannguutit amerlanerit, inatsimmik allannguinerup kingorna innersuussanik aaqqiissuteqarnerit malitsigisaannik allannguutaapput.

### **Pisortanut aningaasaqarnikkut kinguneqaatit**

Siunnersuut pisortanut taasarialinnik aningaasatigut kinguneqaateqassanngatinnegannngilaq.

### **Namminersorlutik inuussutissarsiortunut, innuttaasunut il.il. aningaasaqarnikkut allaffissornikkullu kinguneqaatit**

Suliffeqarfiit inuilluunniit ilaatinneqartut peqqussummi allannguinerit tunuliaqutarlugit, ingerlatsinerminnik allaffissornikkut aningaasaqarnikkullu annikinnerusumik allannguissappata, peqqussummik allannguneq allaffissornikkut aningaasaqarnikkullu annikitsumik kinguneqarsinnaavoq. Aningaasartuutit taakku annikitsuinnaanissaat nalilerneqarpoq.

Suliffeqarfiit inuillu aningaasalersuinerit ilaannik sullissisut, aningaasatigut peqquserluutininik malunnarunnaarsaaneq pillugu inatsimmi nalunaarsorneqartussaaneq pisussaaffimmik malinninngitsut, allaffissornikkut akiligassinneqarsinnaanerannut peqqussut Finanstilsynimut periarfissaqalersitsivoq. Tamanna soorunami suliffeqarfimmut inummulluunniit akiligassinneqartumut aningaasatigut kinguneqassaaq. Suliffeqarfik aningaasatigut peqquserluutininik malunnarunnaarsaaneq pillugu inatsimmi § 48, imm. 2-mik unioqquitsitsippat aatsaat akileqquneqarsinnaavoq.

Siunnersuut innuttaasunut aningaasaqarnikkut kinguneqaateqassanngatinnegannngilaq.

### **Tusarniaaneq**

Siunnersuut piffissami 20.12.2023-26.01.2024 tusarniaaffinnut toqqakkanut tusarniaassutigineqarpoq, taamattaarlu tusarniaanermut isaaffimmi [www.naalackersuisut.gl](http://www.naalackersuisut.gl) tamanut saqqummiunneqarluni.

Tusarniaanermut akissutit 10-t tiguneqarput. Tusarniaanermut akissutit Aningaasaqarnermut Ataatsimiititaliamut ilanngussatut nassiunneqarput, taakkulu aalajangernissamut tunngavissiamik allannguinnissamut pissutissaqalersitsinngillat.

Tusarniaanermut akissutini tulliuuttut erseqqissarneqassapput:

### *GrønlandsBANKEN*

GrønlandsBANKEN allannguutissanik iluarisimaarinnippoq. Qallunaat kalaallillu pineqartumi inatsisaasa naapertuunnissaat eqqarsaatigalugu aningaasat tigusassat 20.000 kr.-nit 15.000 kr.-nut appartinneqarnissaannik folketingimut inatsisissatut siunnersuutip malinneqarnissaata isumaliutigineqarsinnaanera, GrønlandsBANKENip tusarniaanermut akisuummini siunnersuutigaa. Ilangullugu Namminersorlutik Oqartussat aningaasanik atuinerup annikillisarnissaa siunertaralugu nunatsinni akiliutigineqartut digitalinngorsarneruneqarnissaannut suliniutinik isumaliuteqarnissaanik GrønlandsBANKEN kaammattuuteqarpoq.

### *Oqaatigisassat*

Aningaasanik tigusassanut killiliussat pillugit malittarisassat Danmarkimisulli annertussuseqarnissaata qularnaarnissaa naapertuuppoq.

### *Trophy Hunting Greenland*

Trophy Hunting Greenland (THG) tusarniaanermut akisuummini aningaasanik tigusassanik inerteqqutip maanna atuuttumit 50.000 kr.-nit 20.000 kr.-nut (maanna 15.000 kr.-nut) appartinnissaa ajornakusoorsinnaasoq erseqqissaatigaa, kortimmi akiliutit ilaat THG naapertorlugu tamatigut atorsinnaaneq ajormata, taamatullu kortinit akiliutinit nunani tamalaani atorineqartunik akiliutinik tigusinerit immikkut aningaasartuuteqarfiusarsinnaammata. Taamattaq THG pinngortitami ilassutitut akiligassanngortitsisarpoq, tamaanilu internetikkut attaveqaateqanngilaq.

### *Oqaatigisassat*

Aningaasanik tigusassanik inerteqqummik sukannerulerulersitsineq, suliffeqarfiit ilaasa suleriaatsiminnik allannguisariaqarnerannik malitseqartussaavoq. Tamatuma taakku sullitaminnut akiliinermi piumasaqaatiminnik allannguinerannik ilaatigut malitseqarsinnaavoq. Tamatumalu saniatigut ingerlatsinermi unammillernartitat THG-p nassuiaatigisaasa aaqiivigineqarsinnaanerat ajornanngissorineqarpoq. Saniatigullu malittarisassanut nutaanut pingaarnertut eqqarsaatigisat, suliffeqarfiit ilaasa maanna akiliisitsinermi tunngavissarititaminnik allannguinnissaannik pissutissaqalersitsisorinarput.

## **Ilanngussat**

1. Aningaasatigut peqquserluutinik malunnarunnaarsaaneq aamma peqqarniisaarniarnermut aningaasalersuineq pitsaaliorniarlugit pineqaatissiissutit pillugit inatsimmi (aningaasatigut peqquserluutinik malunnarunnaarsaaneq pillugu inatsit) inatsisit assigiinngitsut aalajangersagaanni, Kalaallit nunaani ataatsimut peqqusummik atulersitsineq.
2. Aningaasatigut peqquserluutinik malunnarunnaarsaaneq aamma peqqarniisaarniarnermut aningaasalersuineq pitsaaliorniarlugit pineqaatissiissutit

pillugit inatsimmi, (aningaasatigut peqquserluutinik malunnarunnaarsaaneq pillugu inatsit) pitsaaliuinnermut suliniutinut inatsisini arlalinni allannguutit, Kalaallit nunaanut atulersinneqarnissaannut aalajangersakkanik eqikkaaneq.